

20 onns URB

■ (anr) En il novissim Fegliet d'infurmi-ziun da l'Uniun da las Rumantschas e dals Rumantschs en la Bassa (URB) – sut la redacziun da *Ciril Berther* – vegn palesà tge e quant che curra e passa tar noss cumpatriots en la Svizra bassa. Ed i n'è betg pauc. Uschia chattain nus lien ina contribuziun da *Cilgia Vital* davart «20 onns URB». Sia conclusiun è – cun tutta raschun – che l'uniun giubilara saja activa e plain vita, pia da success. La URB ha cuntanschi fitg bler.

Ed anc dad in auter giubileum vegn rapportà: «Dapi 30 onns exista il Chor mischedau grischun Turitg, sa furmà a ses temp da dus anteriurs chors. Ils 13 da november 2011 dat il chor giubilar a Turitg in «Concert per chor ed orgla» – sut

la direcziun da *Remo Weishaupt*, accompagnà da l'organist *Giusep Tschuor*.

Claudia Cadruvi relata davart «Da cumpagnia» cun RTR en la Bassa. Quella ha gì lieu a Berna en preschientscha d'ina rotscha da Rumantschas e Rumantschs che han giudì in bel e varià program. – Preschentads vegnan era Rumantschs cun interessantas occupaziuns e vocaziuns. Quella giada èsi *Giacomin Marugg* che lavura tar la Swiss. – Ils 11 da november vegn arranschà a Cham ina «Saira culturala interrumentscha». – Lunga è la retscha dad occurrenzas en la Bassa, nua che Rumantschs e Rumantschas coopereschan u sa preschentan en diversas spartas.